



Headlines

- प्रधानमंत्री नरेंद्र मोदी होरें आखेआ ऐ जे आतंकवाद गी लेइयै दोगलापन कदें मंजूर नेही।
- केंद्री गृह मंत्री अमित शाह होरें जम्मू च हाड़ प्रभावित इलाकें दा दौरा करियै हालात दा जायजा लैता, उच्चि सतह दी बैठका च राहत उपाएं दी समीक्षा कीती।
- पुंछ जिले दे बालाकोट इलाके च सुरक्षाबलें बन्ने पारा घुसपैठ दी कोश्ट गी नाकाम कीता।
- उत्तर रेलवे दी जम्मू डिविजन नै जम्मू-कटडा बश्कार विशेष रेल गड्डियां चलाइं, जम्मू-श्रीनगर राश्ट्रीय जरनैली शिड़कै पर गड्डिएं दी आओजाई अद्दे-दुब्बे तौरा पर बहाल।
- जम्मू प्रांतै च 2 सितंबर तोड़ी भारी बरखा दी चेतावनी, मौसम विभाग दा आखना ऐ जे इस म्हीने सामान्य कोला मती बरखा होग।



PM-Terrorism

प्रधानमंत्री नरेन्द्र मोदी होरें अज्ज आखेआ ऐ जे आतंकवाद पर दोहरे मापदंड हून स्वीकार नेई कीते जाडन। चीन दे तियानजिन च शंघाई सहयोग संगठन दे शिखर सम्मेलन च अपने भाषणै दरान श्री मोदी होरें आतंकवाद गी समूलची मनुक्ख जाति लेई सब्भनें शा बड्डी चुनौति करार दित्ता ते आखेआ जे आतंकवाद दे हर इक रूप दी सखत लफ्जें च निंदेआ कीती जानी लोड़चदी ऐ। प्रधानमंत्री होरें आखेआ जे भारत, पिच्छले 4 दहाकें थमां आतंकवाद दी मार झल्ला करदा ऐ। उंनें पहलगाम आहले आतंकवादी हमले दे बाद भारत कन्नै इकजुटता दर्शाने आहले मुल्लखें दे प्रति आभार बी जताया। उनें आखेआ।

श्री मोदी होर रूस दे राश्ट्रपति व्लादिमीर पुतिन ते चीन दे राश्ट्रपति शी जिनपिंग हुं'दे कन्नै बी एस.सी.ओ.

शिखर सम्मेलन दरान अपने बचार सांझे कीते। प्रधानमंत्री मोदी होरें अज्ज रूस दे राश्ट्रपति हुं'दे कन्नै दपक्खी बैठक बी कीती।



HM-Jammu Visit

जम्मू दौरे पर आए दे केंद्री गृह मंत्री अमित शाह होरें अज्ज जम्मू दे बिक्रम चौक ते तवी पुलै पर जाइयै हाडै कारण होए दे नुकसान दा जायजा लैता। आकाशवाणी दे जम्मू संवाददाता नै जानकारी दिती ऐ जे गृह मंत्री होरें जिले दे सब्बनें शा मते प्रभावित ग्रांS मंगू चक्क दा बी दौरा करियै हालात दा जायजा लैता। उपराज्यपाल मनोज सिन्हा ते मुख्मन्त्री उमर अब्दुल्ला हुंदे कन्नै अमित शाह बिक्रम चौक कश तवी पुलै पर रूके ते नदी दे दौनें बक्खी होए दे नुकसान दा मुआयना कीता। मगरा गृह मंत्री होरें राजभवन जम्मू च इक उच्चै सतह दी बैठक दी अध्यक्षता कीती। जम्मू संभाग दे किश्ताड, कठुआ, रियासी ते रामबन जिलें च बदल फट्टने, हाड औने ते ल्हास-पस्सियां पौने दिएं घटनाएं च 130 कोला मते लोकें दी जान गई ऐ ते 33 लोक अजें बी लापता ना।

<><><><><><>

Infiltration-Bid

सुरक्षाबलें अज्ज पुंछ जिले दे बालाकोट इलाके च कब्जा रेखा पर घुसपैठ दी इक नापाक कोशश गी नाकाम बनाई दिता ऐ। सोशल मीडिया दी इक पोस्ट च फौज दी व्हाईट नाईट कोर नै दस्सेआ ऐ जे अज्ज बडुलै तकरीबन साड्डे 5 बजे फौज दे सोहगे जवानें कब्जा रेखा दे नेडे संदिग्ध नक्लो हरकत दिक्खी ते तुरत फायर खोली दिता जेह्दे चलदे घुसपैठिए वापस नस्सने गी मजबूर होई गे। एह्दे परैन्त सुरक्षाबलें अपनी निगरानी गी होर बधाई दिता। हालात काबू च न ते कब्जा रेखा पर इस किस्मै दिएं होरनें माडी कोशशें गी नाकाम करने लेई बलें गी अलर्ट पर रक्खेआ गेदा ऐ।

<><><><><><>

Traffic

जम्मू-श्रीनगर राष्ट्री जरनैली सिडकै पर गड्डिएं दी आओजाई आंशिक तौरा पर ब्हाल होई गई ऐ ते सब्बनें शा पैहले बत्ता फसी दिएं गड्डिएं गी गै अगगे बधाया जा'रदा ऐ। लोकें गी सलाह दिती गई ऐ जे ओ ओवर टेकंग नेंई करन ते अनुशासित ढंगै नै गड्डी चलान-तां जे बेवजह जाम जनेही स्थिती पैदा नेंई होयै। लोकें गी इब्बी आक्खेया गया ऐ जे ओ जरनैली सिडकै मुतलक ताजा जानकारियें लेई ट्रैफिक पुलसै दे टवीटर हैंडल पर तक्क रक्खन। उ'आं नगराटा ते जखैनी थमां अज्ज गड्डिएं गी श्रीनगर बक्खी जाने दी इजाजत नेंई दिती गेदी ऐ।

<><><><><><>

Katra-Structures

कटडा प्रशासन नै 15 होटलें समेत कुल 80 ईमारतें दी ल्हास-पस्सिएं दी शैका आहले संवेदनशील ढांचे दे तौरा पर शनाख्त कीती ऐ। एह कार्रवाई जारी बरखें ते हाल च चानचक्क आए दे हाड़ें ते पस्सियां पौने दिएं घटनाएं दी पछोकड़ै च कीती गई ऐ जिंदे कारण जानी नुकसान दे अलावा आम जन-जीवन बुरी चाल्ली प्रभावित होए दा ऐ ते श्री माता वैश्वो देवी जी दी जाततरा बी प्रभावित होई ऐ। कटडा दे एसडीएम पीयूष धोतरा होरें आखेआ ऐ जे संवेदनशील इलाके, जित्थे पस्सिएं दा खतरा होई सकदा ऐ, दे सर्वे दा कम्म अजें बी जारी ऐ ते जिनें थाहरें गी संवेदनशील घोषित करी दितता गेदा ऐ, उन्दे पर नेडमी तक्क रक्खी जा करदी ऐ। उनें आखेआ।

<><><><><><>

PDD-Reasi

हाल च होई दियें भारी बरखें कारण राजौरी जिले च बिजली सप्लाई आहले मैहकमे गी बड़ा मता नुकसान पुज्जा ऐ। बिजली दे 250 खम्बे डिग्गी पे न, 50 ट्रांसफर उड्डी गे न ते 4 पाँवर फीडर बी खराब होई गे न। आकाशवाणी समाचार कन्नै गल्ल करदे होई बिजली मैहकमे दे एग्जीक्यूटिव इंजीनियर अब्दुल राशिद होरें गलाया जे हूनै तोड़ी 50 फीसदी बिजली सप्लाई बहाल करी दित्ती गई ऐ। उनें अगगे आखेआ।

<><><><><><>

Weather

मौसम विभाग नै कल्लै तोड़ी जम्मू, कठुआ, ते साम्बा च भारी थमां बड़ी भारी बरखा पौने दी पेशगोई कीती ऐ, जदके रजौरी, रियासी, डोडा, रामबन, किशतवाड़, ते उधमपुर च दर्मेयाने दर्जे थमां भारी बरखा बरने दे असार न। मौसम विभाग नै बसनीकें गी गुजारिश कीती ऐ जे ओहू सोहगे-सतर्क रौहन ते कुसै बी एमरजेन्सी दी सूरतै च 112 नम्बरै पर राबता करन। तोंआई मौसम विभाग नै सितम्बर म्हीने च सामान्य कोला मती बरखा भरने दा अनुमान दस्सेया ऐ। मैहकमे दी मौसम बारे पेशगोई सरबंधी मासिक रिपोर्ट च दस्सेया गया ऐ जे मुल्खा दे ज्यादातर हिस्सें च इस म्हीने सामान्य कोला मती बरखा भरने दे आसार ऐ। उ'आं पूर्वोत्तर ते पूर्वी भारत दे किश हिस्सें च ते कन्नै दक्खनी प्रायद्वीप दे केई इलाकें च सामान्य कोला घट्ट बरखा पौने दी मेद ऐ।



PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां ना। इच्छुक आवेदक जेहदी उमर 24 थमां 50 बरें दे बश्कार ऐ ते ओहू जम्मू जिले दा रौहने आह्ला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रेजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

